

**■ COLUMNA**

# Las Bernaisas

DA CHATRINA JOSTY\*

**L**as Bernaisas ma fascineschan. Tuttina tge aura e tge temperatura: Ellas van cun velo. Quai tuna uss ecologic, cler, e patgific: prender il velo, ir ord chassa, tschivlottar ina flotta melodia, far chau ad auters ch'èn en gir cun velo, arri-var al lieu da lavur, prender giu chapellina e chanaster cun la termos ed il tupperware, serrar il velo, anc adina tschivlottar...

**M**a na, uschè romantic n'èsi betg.

**E**llas van cun velo sco rowdys. Ellas surpassan da dretg e da sanester e quai senza avertir, ellas na salidan mai, mai, mai, anzi, sch'ins na va betg ord via u sch'ins parta memia plaun cur che l'ampla mussa verd, survegn'ins in lavachau.

**P**erquai na vom jau betg cun velo en citad. Jau hai tema. Ed jau vegn adina surpassada da tuttas, betg mo da las ominusas cun ils e-bikes che fan minimum 30 kilometers l'ura. Na, da dunnas da tut las vegliadetgnas sin velos baracs che van sco sch'ellas vegnissan persequitadas da la polizia.

**I**l fenomen è enconuscent e derasà era tar las



Bernaisas las pli prominentas. Ursula Wyss, la cussegliera da citad e directura da traffic da Berna, è vegnida filmada co ch'ella surpassa gist duas glischs cotschnas – e quai senza chapellina. Era la presidenta dals verds, Regula Rytz, s'ha preschantada durant ses cumbat electoral adina puspè senza chapellina e cun il stil dad ir cun velo bernais. Regula Rytz ch'è dal rest l'antecessura dad Ursula Wyss al timun dal traffic bernais. Ils adversaris politics discuteschan anc tgenina ch'ha instradà e realisà las meglras ideas per il traffic (da velo!).

**T**raffic a Berna vul dal rest dir en emprima lingia traffic da velos. La citad ha in'offensiva da velo cun la finamira centrala da daventar LA chapitala da velo. Ils autos duain far lieu: Il plan prevesa tranter auter da stritgar la mesadad da las piazzas da parcar pu-

blicas ed in scumond da charrar en il center da citad.

**I**l vehichel dal preschent e da l'avegnir è damai il velo.

**A**mai na pertutga quai betg enormamain cun quai ch'jau sun daventada peduna ord persvasiun.

**U**schia vom jau ord via a l'offensiva da las velocipedistas bernaisas ed observesch davent dal trottuar las scenas da velo quotidianas. Per exempel quel di en december ch'igl ha navì a Berna. Ed uss betg crair che las Bernaisas sajan idas a pè. Nana, tschintg centimeters naiv ed in vent criv giu dal Gantrisch n'han impedi nagina.

**P**uspè nagut da romantica, ma bler cumbat – senza guants e per part cun chalzers bass han ellas fatg via sur trottuars e sin vials da velo, la chapitscha giu en il frunt – nagin surrir, ma era – suprendentamain – nagins accidents.

**J**au admir las Bernaisas e ma giavisch 20 centimeters naiv – jau prendess lura ils skis da passlung. Ed ellas? Tgi sa!

\* Chatrina Josty (35) è anteriura moderatura e redactura dal Telesguard. Ella abitescha a Köniz sper Berna e lavura sco magistra ed autura.